

剑秋公传

公讳纲升，字九如，一字剑秋。门下士欧阳子洛之先君子也。公世居邑治之南，相去数十里，生平行谊表著於里党间者，卓然有古君子风，而苟非实得诸耳目之见闻，则亦乌能阐其万一哉，岁丁亥予主讲龙洲书院，课业之暇，间尝询及公之行事，知之者咸乐为殚述焉，予然后叹公之品量，卓越寻常，诚足为一邑之表，而士林所景仰不忘者也。公尝以晚近惑异端，往往於人弃世之际，延僧、礼佛，簞鼓相倾，公之心实深厌之，故於病笃之下，乃谆谆焉诫其子曰：“吾生不好左道。我死，儿辈惟行文公，家礼数日而已。万不可苟且徇俗，致负吾之初心也。”呜呼！公之见道如此其明；公之卫道如此其力，视世之背孔孟之教而崇佛老之言者不已超出万万哉！公秉性耿直，世之怀奸诈行险者，公视若仇讎，嫉恶之情常流露於眉睫。乡邻有难，极力排解，究其心，谦虚冲穆，未尝稍自以为功。荒歉之年，宗族姻党贫乏无以为家者，公独切沟壑之忧，散亡之懼，或解衣以衣之，推食以食之。侧怛慈祥，根诸天性，轻财尚义，举世希闻。由是以观，较诸仓箱坐拥，囊橐自充，而视人

之冻饿，忽忽不加戚於心者，其相去又为何如耶？呜呼！公负磊落不羁之才，固宜登诸廊庙，为桢干，为霖雨。上则致其主於明圣，下则泽其民於雍熙，而岂意阨於时命，抑郁以终，竟未获与当世名公卿，留泽千载，斯亦人之大不平者矣。虽然，公有可以无感者在也，公子三、洛、浚、滋，励学敦品、远大自期，予甚器之，他日为国家用，荣荫九原，足为公慰。浚、滋赋质淳朴，惟勤惟俭，克绍箕裘。孙男五，皆头角崭然。公其有知，应亦为之含笑矣。吁！诗书启秀，兰桂争荣，天殆将昌盛之後乎！不然，何一门之多贤也。予故乐为公其幽，而益以见公培植之厚云。

光绪十三年，岁次丁亥，秋月吉日

四川、补用同知直

隶州，知州，前任隆昌县、知县、拔贡生、

掌教龙洲书院世愚弟熊运升拜撰